

吳
中
人
物
志

吳中人物志卷之七

長洲張景春甫輯

曾孫獻壽論贊

文苑

漢

嚴助會稽吳人嚴夫子子也或言族家子也公孫弘
開東閭延賢人與謀議上令助等與大臣辯論中外
相應以義理之文大臣數詘其尤親幸者惟助與吾
丘壽王見任用而助最先進後留侍中有奇異輒使
為文及作賦頌數十篇

馬彪字義方吳郡無錫人家貧為諸生遊太學有雅才而訥於言郡舉孝廉試經第一除郎中校書東觀數奏賦頌奇文因事諷諫靈帝異之第五永使督幽州百官祖餞于長樂觀皆賦詩彪獨作箴蔡邕等美其文後終內黃令有德政詔東觀畫像以勸學者子岱

陸績康少子也容貌雄壯博學多識星曆筭數無不該覽孫權辟為東曹掾以直道見憚出為鬱林太守加偏將軍績既有臂疾又意在儒雅雖有軍事著述不廢在任卒年三十二作易釋玄

張溫吳郡吳人父允輕財重士名顯州郡溫少脩節操容貌奇偉權聞之延見拜議郎以輔義中郎將使蜀溫至蜀詣闕拜章蜀人甚貴其才還頃之權既陰詔溫稱美蜀政又嫌其聲名太盛遂因事害溫將軍臨統表理溫寃不報

三國

虎友字子正郡人年十一華歆行風俗見而異之因呼曰沈即可登車語乎友遂巡却曰君子講好會宴以禮今仁義陵遲聖道漸壞先生銜命將以裨補先王之教整齊風俗而輕脫威儀猶負薪救火更益其

熾歆慙曰自桓靈以來雖多英彥未有幼童若此者
既冠博學善屬文兼好武事注孫子兵法又能辯於
口每所至衆皆默然莫與為對世言其筆之妙舌之
妙刀之妙三者皆過絕於人孫權以禮聘之既至論
王霸之略正色立朝清議峻厲為庸臣所譖權疑其
終不為已用故害之時年二十九

韋曜字弘嗣吳郡雲陽人本名昭史為晉諱改之少
好學能文遷太子庶子時蔡頴在東宮好博奕太子
和以為無益命曜論之孫亮即位諸葛恪表曜為太
史令撰吳書華歆薛瑩等與叅同孫休欲延曜侍講

而將軍張布士行多玷憚曜以古今警戒休固爭不可竟止不入孫皓時常領左國史皓欲為父和為紀曜以和不登帝位宜為傳皓怒收曜獄中華覈上疏救曜曰曜自少勤學採綜墳典外吏之中少過曜者昔司馬遷有良史才欲使畢成所撰忍不加誅書卒成今曜在吳亦漢之史遷也漢氏承秦則有叔孫通定一代之儀曜之才學亦漢通之次也皓竟誅曜張儼字子節吳人弱冠知名經緯博識族人張溫稱之曰吾家顏子也拜大鴻臚寶鼎中使于晉孫皓謂今南北通好以君有出境之才故相屈行對曰皇皇

者華臣蒙其榮惟古人延譽之美磨勵鋒鏑思不辱命既至車騎將軍賈充尚書令裴秀侍中荀勗等欲傲以所不知而不能屈尚書僕射羊祜尚書何禎並結縞帶之好子勃撰吳錄三十卷孫固

張純字元基海昏令敦之子也與同郡張儼朱異俱童少時往見驃騎將軍朱據據聞三子才名欲試之曰今三賢屈顧老鄙相聞渴甚矣為吾各賦一物夫驪褭以迅驟為功鷹隼以輕疾為妙何必積思乃隨目立成據大悅純賦席云席以冬設簾為夏施揖遜而坐君子攸宜儼賦犬云守則有威出則有獲韓盧

宋鵲書名竹帛異賦弩云南嶽之幹鍾山之銅應機
命中射隼高墉純尤厲操行學博才秀容止可觀拜
郎中為廣德令治有異績擢太子都尉赤烏十三年
廢太子和純忠諫而死

晉

陸機字士衡吳大司馬抗之子也身長七尺其聲如
鍾少有奇才文名冠世領父兵為牙門將吳亡年始
二十退居舊里閉門績學以孫氏在吳而祖父世為
將相勲名江表深慨孫皓舉而棄之乃論權所以得
皓所以亡又欲述其祖父功業作辨亡論二篇太康

末與弟雲俱入洛時國中多難顧榮等勸機還吳機負其才望而志匡世難不從齊王冏既誅趙王倫矜功自伐機惡之作豪士賦以刺焉冏不悟竟以敗機天下秀逸辭藻宏麗張華嘗謂人曰人之為文常恨才少而子更患其多葛洪稱機之文猶玄圃之積玉無非夜光五湖之洪流泉源如一所著文章凡三百餘篇行於世

陸雲字士龍六歲能屬文與兄齊名號曰二陸吳尚書閔鴻見而奇之曰此兒非龍駒當是鳳雛後舉賢良時年十六吳平入洛蔡司徒見機雲兄弟佳參佐

廨中三間瓦屋士龍住東頭而士衡住西頭雲為人
文弱可愛機初詣張華華問雲何在機曰雲有笑疾
未敢自見俄而雲至華為人多髭又將好錦繩繫雲
見而大笑不能自己先是嘗著縑絰上船於水中顧
見其影因大笑落水人救獲免雲與荀隱素未相識
嘗會華座上華曰今日相遇勿為常論雲因抗手曰
雲間陸士龍隱曰日下荀鳴鶴雲又曰既開青雲覩
白雉何不張爾弓布爾矢隱曰本謂雲龍騃騃乃是
山鹿野麋獸弱努強是以發遲華撫掌大笑嘗出補
浚儀令縣稱神明去官追思畫像配食縣社初雲嘗

行宿故人家夜暗迷路莫知所從趣至見一年少美
風姿共談老子辭致深遠向曉辭去行十里里無人
烟雲悟却尋昨宿乃王弼冢雲本無玄學自此談玄
殊進弟耽為平東祭酒亦有清譽與機雲同遭害大
將軍孫偉與朱誕書曰三陸一旦湮滅國表雋望悲
豈一人其為州里所痛如此

陸喜字恭仲瑁第二子少有聲名好學有才思嘗為
自叙其畧曰劉向見新語而作新序桓譚詠新序而
作新論余不自量感子雲之法言而作言道觀賈子
之美才而作訪論觀子政洪範而作古今歷覽蔣子

萬而作審機讀幽通思玄四愁而作娛賓九思其書
近百篇吳平又作西州清論借稱諸葛孔明以行其
書也

褚陶字季雅吳郡錢塘人少聰慧十三作鷗鳥水碓
二賦見者奇之陶嘗謂人曰聖賢備在黃卷中舍此
何求吳平召補尚書郎張華見之謂陸機曰君兄弟
龍躍雲津顧彥先鳳鳴朝陽謂東南之寶已盡不意
復見褚生機曰公但未覩不鳴不躍者耳華曰故知
延門之德不孤川岳之寶不匱矣

孫惠字德施吳主宗室好學有才識晉永寧元年赴

齊王問義兵下邳惠乃詭稱南岳逸民秦祕之以書
于東海王越勉以勤王匡世之畧詞義甚美越省其
書招求之惠乃出見越即以為記室參軍專掌文疏
預參謀議每造書檄越或驛馬催之應命立成皆有
辭旨又獻書於問諷以五難四不可勸令委讓萬機
歸藩青岱辭甚深切問不能納果敗

張融字思光弱冠有名道士同郡陸脩靜以白鷺羽
扇塵尾遺之曰此既異物以奉異人解褐為宋新安
王子鸞行叅軍作海賦文辭詭激獨與衆異後以示
鎮軍將軍顧覲之覲之曰卿此賦實超玄虛但恨不

道益耳融即求筆注曰漉沙構白熬波出素積雪中
春飛霜暑路此四句後所足也融家貧欲仕乃與從
叔征北將軍永書曰融昔幼學早訓家風雖則不敏
率以成性布衣韋帶弱年所安簞食瓢飲不覺不樂
但以世業清貧人生多待榛栗棗脩女贄既長束帛
禽鳥男禮已大勉身就官十年七仕不欲代耕何至
此事昔求三吳一丞雖屬舛錯今聞南康缺守願得
為之融不知階級政以求丞不得所以求郡求郡不
得亦可復求丞張氏自敷以來並以脩儀範為事至
融風止詭越高帝素愛融為太尉時與融款接融嘗

笑曰此人不可無一不可有二高帝出太極殿西室
融入彌時方登階級就席上曰何乃遲為融對曰自
地升天理不得速時魏主至淮而退帝問何意忽來
忽去未有荅者融時下坐抗聲曰以無道而來見有
道而去公卿咸以為捷融善草書常自美其能帝曰
卿書殊為骨力但恨無二王法荅曰非恨臣無二王
法亦恨二王無臣法常歎曰不恨我不見古人所恨
古人不見我融形貌短醜精神清徹王敬則見融革
帶寬殆將至髀謂曰革帶太急融曰既非步吏急帶
何為融假東出武帝問融住何處荅臣陸處無屋舟

居無水後上問其從兄緒緒曰融近東出未有居止
權牽小船於岸上住上大笑融玄義無師法而神解
過人高談鮮能抗拒

南朝

陸倕字佐公慧曉第三子少勤學善屬文於宅內起
兩茅屋杜絕往來晝夜讀書如此者數歲所讀一編
必誦於口嘗借人漢書失五行志四卷乃暗寫還之
略無遺脫幼為外祖張岱所異岱嘗謂諸子曰此兒
汝家元陽也年十七舉本州秀才永明二年刺史竟
陵王子良為護軍將軍傾意賓客開西邸以延英俊

倅以文學親侍嘗為感知已賦以贈任昉昉為御史中丞簪裾輻湊預其宴者殷芸到溉劉苞劉孺劉顯稱為龍門之遊時昭明太子愛文好士倅與殷芸等同見賓禮武帝雅愛倅才勅撰新漏刻銘又詔為石闕銘皆嘗稱賞

陸煦杲弟少警敏學有思理天監初歷官中書侍郎尚書左丞太子家令撰晉書未就著陸史十五卷陸氏驪泉志一卷並行于世子罩字洞元善屬文仕梁太子中庶子終光祿卿母老求去公卿祖道於征虜亭太子賜黃金而歸

張率字士簡父瓌十二能文常日限為詩一篇或數日不作則追補之稍進作賦頌至年十六向作二千餘首有虞訥者見而詆之率乃一旦焚毀更為詩示焉托云沈約訥便句句嗟稱無字不善率曰此吾作也訥慙時陸少玄家有父澄藏書萬卷率與少玄善盡借讀其書與同郡陸倕陸厥為友嘗詣沈約遇任昉在坐約謂昉曰此二子才秀皆南金也卿可識之天監初遷司徒謝朓掾直文德待詔省勅使抄乙庫書又使撰古婦人事使工書人琅琊王琛吳郡范懷約等寫給後宮率取假東歸論者謂為傲世率懼乃

為待詔賦奏之見稱手勅曰相如工而不敏枚臯速而不工卿可兼二子於金馬矣又侍宴賦詩武帝別賜率詩率奏詩往反引見玉衡殿謂曰卿東南物望朕宿昔所聞祕書丞天下清官東南望胄未有為之者今以相處為卿定名譽四年禊飲華光殿是日河南國獻赤龍駒能拜伏善舞詔率與到溉周興嗣為賦武帝以率與興嗣為工率嗜酒不事家務在新安日遣家僮載米三千石還吳及至宅耗太半率問其故荅曰雀鼠耗耳率笑而言曰壯哉雀鼠竟不研問自少屬文七畧及藝文志所載詩賦已亡並補作之

張玄之字祖希少聰慧以才學顯初為縣丞以職事對府不知官曹處吏白門下責之時扶風張業聞玄之諸生試引見之與語大驚曰今日相遭真解喏矣遂請上堂難問極日豫章太守范甯亦稱玄之為吳士之秀孝武時出為吳興太守與會稽內史謝玄同時之郡論者以為南北之望亦稱二玄玄之與顧敷俱顧和中外孫時玄之九歲敷七歲同至寺中見佛般泥洹像弟子有泣有不泣者以問二孫玄之謂被親故泣不被親故不泣敷曰當由忘情故不泣不能忘情故泣

顧協字正禮晉司空和六世孫外從祖右光祿張永嘗携協遊武丘山協年數歲永撫之曰兒欲何戲協曰政欲枕石漱流永歎賞之及長好學以精力稱初為揚州議曹從事沈約覽其文而歎曰江左以來未有斯作也張率嘗薦之於朝問協年率言三十五帝曰北方高涼四十強仕南方卑濕三十已衰如協便為已老但其事親孝友不可遺於草澤於是以協為兼太學博士累遷湘東王記室普通中有詔舉士湘東王表薦之即召通直散騎侍郎兼中書通事舍人張永裕第三子也兄演鏡弟辯岱俱知名永博涉書

史能為文章善隸書騎射雜藝觸類兼善為文帝所知

陸雲公字子龍父完字楚卿梁寧遠長史雲公五歲誦論語毛詩九歲讀漢書從祖侄與沛國劉顯質問十事雲公對無所失顯稱異之及長州舉秀才累遷宣惠武陵王平西湘東王繹行參軍雲公嘗製太伯廟碑吳興太守張纘讀其文歎曰今之蔡伯喈也纘至都言于武帝召為尚書儀曹郎太清元年卒年三十七葬橫山有文集行于時子瓊

陸瓊字伯玉六歲能詩大同末父雲公受武帝詔校

定基品到溉朱异並集瓊時八歲於客前覆局由是
都下號曰神童武帝召見風神警亮進退詳審帝甚
異之年十一丁父喪有至性侯景亂携母避地讀書
陳天嘉中以文學遷尚書殿中郎為文帝所知吏部
尚書徐陵薦于宣帝言瓊識具優敏文史足用進居
郎署歲月過淹乃除司徒左西掾尋兼通直散騎常
侍初雲公奉梁武勅撰嘉瑞記瓊述其旨而續焉勒
成一家之言遷吏部尚書著作如故瓊詳練譜牒雅
有識鑒性尤謙儉位望雖隆執志逾下俸祿所入皆
散宗族家無餘財母憂哀毀卒有文集二十卷子從

典

陸琰字溫玉父令公梁中書宣城王記室叅軍琰幼孤好學有志操州舉秀才解褐宣惠始興王行叅軍累遷法曹外兵叅軍直嘉德殿學士世祖以琰博學善占誦引置左右嘗使製刀銘援筆無所點竄世祖稱賞賜衣一襲俄兼通直散騎常侍副琅玕王厚聘齊齊人傾心焉尋卒年三十四太子深悼之加其贈賻親為製銘後至德二年追贈司農卿後主求琰遺文傳之弟瑜

陸瑜字幹玉州舉秀才解褐驃騎安成王行叅軍兄

琰時為管記並以才學侍左右太建二年太子釋奠于太學宮臣並賦詩命瑜為序文甚贍麗時太子好學欲博觀子史命瑜纂要成書未就卒年四十四追贈光祿卿

陸珍字潤玉梁大匠卿晏之子弘雅有識度好學能文舉秀才對策高第吏部尚書袁樞薦之於世祖超授衡陽王文學直天保殿學士後主在東宮徵為管記仍除中舍人管記如故以疾還鄉太子解衣贈之至為流涕卒年三十七追贈少府卿有集十卷

陸琛字潔玉宣毅臨川王長史丘公之子少事後母

以孝聞世祖在會稽時琛年十八上善政頌詞甚工
由是知名舉秀才起家為衡陽王主簿直宣明殿學
士太子愛琛才辯深禮遇之後主嗣位遷給事黃門
侍郎中書舍人卒年四十二

陸夷父曄齊霍州刺史九歲日誦二千言尚書僕射
楊遵彥見而異之曰陸氏代有人矣

隋

陸播字士紳郡人祖映梁侍中父陟諮議將軍世有
文業播不墜家聲隋仁壽中召補學士春宮大業初
為燕王記室至唐貞觀中授朝散大夫魏王府文學

陸從典字由儀年八歲讀沈約回文研銘援筆擬之
便有佳致十二作柳賦其詞尤美從父瑜特所賞愛
瑜卒乃集其遺文序而傳之位太子洗馬司徒左西
掾陳亡入隋為著作佐郎詔續司馬遷史迄於隋末
就而卒

唐

朱佐日郡人在唐兩登制科三為御史武后嘗吟詩
曰白日依山盡黃河入海流欲窮千里目更上一層
樓問是誰作李嶠對曰御史朱佐日詩也賜絲百匹
轉侍御史子承慶十六舉秀才嘗為昭陵輓詩入高

等由是父子齊名

于公異吳人進士擢第李晟表為招討府掌書記朱泚平露布於德宗曰臣既肅清宮禁祇奉寢園鍾簴不移廟貌如故帝覽泣下曰誰為之辭或以公異對帝咨歎久之其詳見唐書文藝傳

陸暢字達夫郡人早有才名舉進士以祕書丞為觀察判官張咨宗薦其植性謹和肄事周敏剖斷公事人人不寃乞賜章服初王仲舒刺洪州暢在幙府終日長吟不親公牘仲舒微言竟拂衣去辭曰不可偶為大夫參佐而妨志業由此美譽益彰及登省署遇

雲陽公主出降詔為催粧詩恩例外別賜宮錦五十段楞伽瓶及唾壺各一又為劔南西川節度韋臯所厚禮始天寶間李白為蜀道難以忤嚴武暢更為蜀道易以美臯臯在蜀數進兵器上刻定秦字既死人以訛臯暢上疏言臣在蜀日見定秦乃造兵器匠者姓名耳由是得釋

張籍字文昌吳縣人貞元十五年進士為太常寺太祝韓愈薦為國子博士當時有名士皆與游而愈益重之籍性狷直嘗責愈喜博塞及為駁雜之說論議好勝人其排釋老不能著書若孟軻楊雄以垂世愈

亦貽書答之仕至國子司業張洎論籍為詩長於古
風當時與元微之白居易孟東野歌詞為天下宗匠
號為元和體又長於今律貞元已前多拘於常態至
籍一變而章句之妙冠於流品子黯

顧況字逋翁郡人性詼諧工於歌詩嘗為韓滉節度
判官初李泌流放江南與柳渾及況遊會渾輔政以
校書郎徵況泌復繼入況自謂知己秉樞要當得達
官久之方遷著作郎怏怏不樂求歸於吳泌卒作詩
以諷為法司所劾貶饒州司戶後結廬茅山自號華
陽真逸有集二十卷皆散軼今所傳止古今體上下

二卷年九十而終子非熊滑稽好辨凌轢當世為衆所抑困于場屋三十載長慶中諫議大夫陳商放榜上怪無非熊名詔有司進所試追榜勅及第天下寒俊由是知勸矣累佐使府大中間歷盱眙尉慕父風棄官亦隱茹山或傳其得長生術云

陸宸字祥文為翰林學士宸工文屬辭敏速若注射然一時書命同僚自以為不及昭宗優遇之帝嘗作賦奉詔皆和獨宸先就帝覽之嘆曰貞元時陸贄吳通玄兄弟善內廷之文後無繼者今朕得之宸始舉進士時方遷幸而六月榜出至是每暑相戲曰造榜

天也以譏哀非其時故事自三省得宰相有光署錢
留為宴資學士院未始有也至哀送錢五十萬以榮
近司進中書侍郎判戶部嗣覃王以兵伐鳳翔哀諫
曰國步方安不宜加兵近輔必為他盜所乘無益也
且親王而屬軍事必有後害帝顧興軍責哀沮撓貶
峽州刺史師果敗崔胤罷相哀代之胤怨望及是議
以為陰有黨附貶沂王傅分司東都胤死復授吏部
尚書從遷洛柳璨始附朱全忠謀去朝廷衣冠有望
者貶哀濮州司戶叅軍殺之白馬驛

楊牧字歲之隋越國公素之裔世居馮翊父遺直德

宗時上書闕下仕為濠州錄事叅軍客死姑蘇收始
年七歲處喪若成人母長孫夫人親授經十三通大
義善屬文所賦輒就吳人號為神童里中多造門觀
賦詩至壓敗其藩牧嘲之曰爾非羸角者奚用觸吾
藩及壯廣顙深頤䟽眉目寡言笑博學強記至他藝
無不通以兄假未仕不肯舉進士既假禡褐乃入京
師明年擢進士杜琮表署淮南判官宰相馬植又表
為渭南尉集賢校理議補監察御史收以兄假方外
遷誼不可先固辭復為琮節度府判官弟巖並在幕
府未幾假自浙西判改擢監察御史而收亦西川遷

兄弟同臺世榮其友以詳禮學改太常博士而嚴亦
自揚州召為監察御史牧因建言漢制總羣官而聽
曰省分務而專治曰寺太常分務專治者也所以嚴
天子旂常今旂常因車飾隸太僕非是未及行以毋
喪免

孫發吳人舉百篇科皮日休贈詩有云百篇宮體喧
金屋一日官銜下玉除陸龜蒙亦有贈云直應天授
興詩情百詠惟消一日成其見推重于當時云

范攄唐末吳之處士有子七歲能詩嘗賦贈隱者云
掃葉隨風便澆花趁日陰又賦夏日詩云閑雲生不

雨病葉落非秋方干聞之曰此兒他日必垂名也

五代

蔣貽恭吳人流落入蜀有詩才性特耿直每一吟詠
率多諷刺時蜀主季年臣僚多尚權勢侈傲無節因
為詩以諷之蜀主知其不遜曰敢言之士也特授雅
州名山令仍賜銀緋

吳仁璧字廷寶長洲人蜀主大順中及第善屬文尤
善星學及黃白術吳越王錢鏐待以客禮訪求天文
固辭非所知欲辟入幕又辭去鏐母薨具幣請為誌
文不從鏐怒沉之江中有詩集行世

董思恭吳人初為右史知貢舉事泄流嶺表死所無
篇詠甚多

宋

謝炎字化南太子賓客濤之弟慕韓柳為文與杭州
盧禎齊名時稱盧謝端拱初舉進士調補昭應主簿
徙伊闕知華容公安二縣有集二十卷

方惟深字子通其先莆陽人父龜年官至屯田郎中
卒葬長洲因家焉惟深早通經學為鄉貢第一試禮
部不中即棄去有田一廛與弟躬耕之居常以雅道
自娛尤工於詩每一篇出人爭傳誦時王荊公以知

制誥卧鍾山得所作詩稱其精詣警絕嘗書其句于
扇惟深雖游其門畧無迎合意其孝友清介之風隱
然稱東南若文學行義與朱長文同為鄉人所重崇
寧中郡將以遺逸應詔不赴以年格得興化軍助教
年八十三卒有詩集十卷

吳感字應之以文詞名天聖二年省試第一九年又
中書判拔萃科官至殿中丞家郡中小市橋

孫緯字彥文擢進士第歷宗正寺丞尚書郎為人誠
朴好以俗語為詩多近於理尤精一時典故嘗著集
謚摭錄宋朝人物志行于世

楊備天聖中為長溪令後宰華亭丁內艱歸家于吳
樂風俗之美效白體作姑蘇好十章又作姑蘇為題
每題箋釋其事至今行于世范成大脩志亦多采之
劉少逸郡人年十一文詞老成從其師潘閔謁長洲
令王元之吳縣令羅思純因所作為贄二令疑其假
手於人不之信試令與之聯思純倡曰無風燈焰直
少逸曰有月竹陰寒元之曰一回酒渴思吞海少逸
曰幾度詩狂欲上天凡數十聯皆稱敏妙二令驚異
聞于朝端拱二年進士及第官至尚書員外郎
謝景初字師厚濤之子慶曆六年進士及第以大理

評事知越之餘姚縣始作海防水患民賴以安以屯
田卽致仕性倜儻勁峭博學能文尤長於詩每為歐
陽公王介甫梅聖俞所推重黃庭堅其壻也庭堅自
謂得句法於謝公云第二景平字師同以蔭授校書
卽第進士終祕書丞工於詩景回字師復年十九所
為文詞已可傳載

李育字仲蒙吳人馮當世榜進士第四人能為詩性
高簡仕不甚顯而人少知之者嘗賦合肥飛騎橋尤
為膾炙人口其詩曰魏人野戰如鷹揚吳人水戰如
龍驤氣吐吳州及魏國建旗敢到新城傍伯主心當

萬夫敵麾下倉皇無羽旄遂窮事變接短兵生死之
間不容息馬奔津橋橋半徹洶洶有聲如地裂蛟怒
橫飛秋水空鶚驚徑度秋雲濶奮迅金羈汗沾臆濟
主艱難天借力艱難始是扶主時平生主君須愛惜
昔有趙倚樓鄭鷗鵠崔鴛鴦鮑孤雁可謂李飛騎矣
丁偃嘉祐四年與朱長文同登進士初試邇英延講
藝有詩云白虎前芳掩金華舊事輕天心非不寤垂
意在蒼生有古詩諷諫之體是歲奏名甚高而御前
下第自是二十年方中選

鄭時字是翁樞密戩之孫宣和六年進士知太平州

當塗縣撫民先訓諭後刑罰民多化之秩滿遷建康府通判留守晁尚書謙之稱為長者以疾奉祠終於朝奉大夫性嗜書札自左氏史漢三國六朝以至韓柳名家之文悉有成編一時學者稱之

王伯廣字師德常熟人少從游楊邦弼由進士乙科調湖州德清尉嘗過臨安謁張栻栻奇其才選授溫州平陽教授平生工於詩其四六尤為人膾炙所著有聽雨集

陳起宗字興祖政和五年進士年三十七以徽猷閣學士知并州卒詩篇瀟灑有陶謝風韻

樂信字功成由淮海徙崑山紹興二十四年進士有
文名尤長於詩與范成大馬先覺唱和為社成大每
以樂先生稱之官至軍器監簿

張公秀字仲實從葉適游風流詞翰推重一時紹興
初為嘉興之崇德丞遂寓郊野作漁簑堂晚知台州
臨海縣尤有善政

邊惇德字公辯祖珉始家崑山幼孤貧孝不廢禮以
能詩名為范成大所知嘗與唱和有敢向詩壇挑老
將之句五中鄉舉就奏名年逾六十乃引年致仕郡
縣列其行義特改通直郎仍著為令撰脂韋子五十

卷子瀛字道卿與弟濟並有文名濟子應升字子用
淳祐初進士應升子雲遇字龍光寶祐四年進士雲
遇弟實與凌萬頃同脩玉峯志

周甫字次山常熟人五歲誦論語淳熙十年以舉子
業秋試為解魁後棄去研窮經史百氏之書識見超
卓文筆凌厲叅政宇文紹節館之以邊功累官不就
所著韓生傳章華臺記石頭城歌等作

張攀字從龍常熟人淳熙十二年進士歷祕書丞其
在祕書銓次中興館閣書目凡萬卷上之改尚左軍
器監同日再命殿中侍御史兼侍講除起居郎崇政

殿說書有文集奏議并漢唐論摠若干卷

陳振字振亨古靈先生之後父遵出贅崑山李侍御衡女因家焉振性至孝以祿不逮養刻木為親像一飯必祭尤樂善急義為文簡健高雅能追古作無宋季陋習官至太府寺丞知永瑞二州致仕卒有文集五十卷子昌世亦以文鳴兼優吏事由太府丞知信州擢吏部郎召對理宗有一廡可喜之褒後知瑞州所至有遺愛子明復朝奉郎通判慶元府

周南字南仲郡人年十六時即陋科舉之學乃往從葉適游為文詞精麗達於時用每以世道興廢為已

任登紹熙元年進士授文林郎秘書正字娶黃度女
會度言忤當路御史覈度并南罷之俱入偽學黨開
禧三年召試館職南對策詆權要言者劾罷之

武如愚其先開封著姓南渡後定居姑蘇如愚早孤
依故人龔相能刻勵于學業文詞以祖澤入官

沈義甫字伯時吳江震澤人嘉定十六年領鄉薦仕
至南康軍白鹿洞書院山長以文鳴于時

朱寢炎字明叔長文五世孫以祖廕授將仕郎有鑒
江唱和集寢炎性倜儻善持論為詞章慕朱希真亦
名樵唱集

元

秦輔之嘉定人博覽載籍多所見聞時邑自崑山析置以來未有紀載因撰練川志子良乞序於楊維禎而梓行之別著有格物擇善二錄易注史斷棠陰政績武事要略忠孝百詠惜皆不傳

徐雷龍字幼成惇祐間名綴解榜授登仕郎嘗從狀元阮登炳習舉子業為時論所重有許溪三絕之名謂雷龍之論黃竹野之策劉浩然之賦也元初以達官薦授武進縣學教諭不赴居光福山中以壽終耿時舉字德基與范成大以詩唱和郡守王喚建西

樓時舉賦詩見稱于時久居太學不得第

劉岳字公泰其先宋醫名家自南康東遊吳遂定居焉元世祖詔求南士有司以岳應聘入覲便殿詢其先業即命官太醫院俾出入帷幄時稱為劉三點蓋以其指點三下洞知六脉云未幾詔下劉岳儒士也視其文合古作者可令掌誥命豈以方伎處之改翰林學士知制誥同脩國史岳後屢乞補外乃授建昌路總管卒于官還葬于吳岳少嘗讀書白鹿洞書院與脩江李嘉龍東魯孔德達為友詩文典雅造詣于古所著有東崖小稿

范霖縉雲人元祖召見世祖授江浙儒學提舉轉禮部侍郎立朝有論議氣節凌人因往游于吳遂家焉所作詩有歲寒小稟二卷刻梓行世

朱德潤字澤民崑山人為睢陽五老貫之九世孫也當元延祐末游燕京吳興趙孟頫薦于仁宗召見命為國史院編脩官明年英宗嗣位授鎮東儒學提舉以歸至正十一年浙省平章辟為叅謀軍事後攝守長興招徠流離政績居多尋以病免德潤博古有文尤工繪事故虞文靖公序其所著存復齋稿有云澤民文章典雅而理致甚明獨惜以畫事掩其名然識

者不厭其多能也其詳見周左丞撰墓銘

張淵字清夫吳江人仕元為東省提舉有心遠堂集
虞文靜公為序

衛培字寧深狀元文節公曾孫博通經史習知前代
典故延祐七年郡以培充貢龍虎榜賦文不起草謂
有楊馬之才嘗聘為訓導州學號月山先生所著有
過耳集十卷同時有李季高亦以文學並稱

王立中字彥強先蜀之遂寧人宋侍郎諱極始家于
吳曾祖矩之同知平江路總管府事祖光祖常熟尉
父平孫黃巖鹽場司令立中九歲而孤蔭授開化尉

歸老于家凡十九年而終自為銘誌立中長於詞尤
善畫有文集二十卷

素易字通甫其先自汴來吳故今為吳人少敏於學
常薦于朝力辭之歸隱吳淞江之濱所居名靜春堂
其詩集亦以是名虞伯生楊仲弘輩數人為之叙而
鮮于伯機稱其閑遠清麗稍加精密少陵不難到其
為一時名流推尚如此吳興趙子昂又嘗取漢司徒
卧雪事寫圖遺之卒年四十五金華黃晉卿為誌其
墓子仲長亦有文學

俞淡洞庭山人在宋以詞賦稱宋亡隱居著書不復

仕精於易學尤好鼓琴撰幽明辯惑弦歌毛詩譜等書

龔璘字子敬宋寶謨閣司農卿湛之子自高郵徙鎮江宦遊徂吳因家焉德祐內附士大夫居班行者例遣北上湛在遣中行至莘縣不食而卒璘悲不自勝語其弟曰國亡家破兄弟少孤不能力振門戶獨不可為儒以辱先邪璘於是刻苦於學文譽籍甚浙右憲使東平徐公琰辟寘幕下尋舉教官大名高公參預外省璘以書論後法之弊喜曰子有用之才也璘曰進賢退不肖天下士如某者能一一致哉又有交

薦璫者皆不報有存悔齋稿傳于時

虞堪字勝伯宋丞相雍國忠肅公八世孫自堪以上居吳堪績學克世其家嘗搜訪先忠肅公文集於蜀中世亂不果一時名勝多為詩文相其行自先世譜系與凡像笏保藏不失堪學博行脩為一時所推居笠澤鄉人嘗為義塾以延講教其著述有鼓枻豪藏于家于時有陳介叔介陸頤養正金鏐南仲皆其門人也

國朝

高啓字季迪長洲人其先民家少孤兄咨成淮右時

往來江城以居好作詩出警語人或異之至正間張
太尉開府平江承制以淮南行省叅知政事臨川饒
介領咨議叅軍事介有文學豪宕聲望甚隆自太尉
而下皆稱臨川公而不名頗愛士一時有名之士多
出其門啓時年十六或薦于公乃召見使為詩甚驚
異之以為上客啓既壯益務為詩詩益精名益起啓
復俊爽好權畧與張憲王行宋克僧道衍輩游又皆
談辨不羈遂以為天下事可就啓娶青丘周氏遂依
外家居終元之世不仕雖臨川公遇之厚不為屈也
洪武二年詔脩元史啓至京入局仍命給牒放還五

年國子祭酒江夏魏公觀來知府事會觀治故府有
上變密告觀興復故宮反狀上命御史張度廉其
迹得啓所為上梁文因連坐之逮至京而卒年三十
九啓身長七尺餘有文武才於書無所不讀尤粹史
學嘗著威愛四臣等論馳驟上下精采煥發他文尤
精鑿典贍其詩始以唐人為法極意太白而縱意諸
家隨所擬無不似之其緣情隨事因物賦形縱橫百
出開闢變化不拘一體蓋數百年來為世詩豪而自
成一大家也

楊基字孟載其先蜀人有仕江左者寓吳至基遂為

吳人基頴敏絕人九歲能背誦六經稍長作詩有奇
語時會稽楊維禎寓居松江往來吳下聲光甚殷赫
尤以樂府詩自標致一時士無與言詩者基謁之就
坐上援筆賦鐫笛歌因而驚曰吾謂詩逕已蕪乃復
有孟載也老鐫不得擅場矣遂與俱東謂門人曰吾
在吳又得一鐫來矣若曹就之學優於老鐫也基弱
冠著書十萬餘言名曰論鑒走試儀曹不利會天下
亂乃歸隱于赤山遂以詩名吳中與高啓張羽徐賁
號稱吳中四傑云周左丞伯琦之留江南也以中朝
貴臣尊重無與為比所居廳事惟設一席客至立談

無他坐具惟基見輒解榻欵語極歡初基在赤山有終焉之志張太尉使人羅致之辟為丞相府記室久之辭去

謝徽字元懿長洲人居甫里博學多才以詩領鄉薦入國朝洪武二年與同郡高啓赴召預脩元史授翰林國史院編脩官有旨教功臣弟子員未幾拜吏部郎中辭歸賜金而還後起為國子助教卒于官徽所著有蘭庭集弟恭字元功有蕙庭集並行

王彛字常宗其先蜀人父嘗教授崑山州崑山與嘉定相接彛徙為嘉定人少貧讀書天台山中師事孟

長文氏長文為蘭溪金文安公弟子彛之學故有端緒若文則其所自得為多不苟同於人初會稽楊維禎以文雄一時吳越諸生多歸之彛獨目為文妖作文詆之凡數百言可驗其學之正非希寵盜名以徼一時之利者彛之文精嚴縝密明暢英發不為諛詞浪語以逐時好洪武初詔脩元史極天下之選凡三十二人而出於吳者有高啓謝徽杜寅傳著及彛也史成而以母老乞歸身猶布衣而卒

秦約字文仲淮安人徙家崇明東沙再徙崑山父玉業儒有至行門人私謚孝友先生約至正間擢崇德

州儒學教授洪武辛亥試魁多士超授禮部侍郎以
母老辭歸侍養終制又以寶鈔東帛起聘講論治道
䟽陳學校例當復舊育才守令之選自立一科年四
十者蒞職百日舉以自代郡邑三年造冊與誌書同
進誌則具載忠孝節義禎祥災異之事以備國史采
擇上悅以約年老難以任劇授溧陽縣教諭御史練
則成待制吳成等以約宿學遺老合在館閣論薦不
果用詣華陽洞天訪尋陶魏楊許遺書得遂蕭散之
志在溧陽八年請老歸約受知於名公若張潞公輩
尤見推重所著曰樵海漫槩別有師友話言樵史補

遺孝節錄詩話舊聞又嘗脩崇明志

金文徵字德儒嘉定人洪武初典教于邑登庚戌進士同知延安府鄜州事為州屬秦境與川蜀相接素號難治文徵卓有政績早與從兄德進力學攻文而文徵特簡古時輩推之其文惜多遺佚

申屠衡字仲權長洲人幼從曾稽楊維禎明春秋學尤肆力古文詞嘗自號樹屋傭洪武三年徵至京草諭蜀書旨授翰林脩撰未幾病免謫居濠上所著名扣角集

張適字子宜世吳人八歲能詩稱奇童十三應江浙

鄉試元社將亡遂隱不仕家于樂園里張士誠據吳
日累招不起 國朝詔脩元史擢工部郎中辭歸復
薦所著有甘白集梓行于時

周南老字正道長洲人洪武初召與翰林太常同議
郊祀諸禮禮成移臨安府居後歸卒于鄉所著有拙
逸齋彙別有姑蘇雜詠子敏字遜學署本縣學教諭
俞貞木字有立石澗之孫元末隱居南園 國朝洪
武初薦授樂昌縣令歸葺舊隱以文章為業郡守姚
善折節下士延致訓其子妄以辨曲直逮至京事既
白以疾卒有立菴彙藏于家

盧熊字公武先為南昌武寧人徙吳之崑山父彥達
秘謚夷孝先生熊少業於楊維禎氏洪武初薦授吳
縣學教諭是時文武之臣方給誥勅衆推熊精於筆
札遂授中書舍人閱歲超授奉訓大夫知兗州事嘗
謁宣聖林廟考訂孔顏世系表鄒國公廟處士宋思
義墓其在吳也纂輯吳郡廣記五十卷嘗已刊行於
時熊好古博識工篆隸所著說文字原章句及有廐
城隱書遂蝸集幽憂集清溪集等編年五十以事逮
至京而卒葬長洲縣武丘鄉子彭祖禮部主事

瞿莊字敬孚父嗣興見孝行傳莊曾任吳江儒學訓

導擢翰林典籍與脩洪武正韻累官禮部員外郎二
緒亦以文知名

傅著字則明常熟人召脩元史嘗為縣教諭卒官潞
州知州有味梅齋橐宋景濂學士為序

王璉字汝器立中長子洪武初由無錫縣儒學訓導
遷吏部主事早卒有錦江橐藏于家

鄒奕字弘道郡人大父士表樂善好義延名師於家
塾楊廉夫嘗贈詩有云爾祖傳經如傳寶家孫十歲
早能詩蓋美奕也領元鄉薦授饒州錄事 國初謫

閩西與同郡沈繹誠莊陸禧彥吉婁江丁晉仲敏遊

最密奕之文有吳樵橐

趙友同字彥如浦江人徙居于吳篤志問學祭酒胡儼為華亭教諭時舉友同為訓導少師姚廣孝言友同父良仁遂於醫以家學召為太醫院御醫時脩永樂大典乃以友同為副總裁又用纂脩五經四書性理大全其文學見知于上及奉詔從尚書夏原吉治水來吳所著有存齋集藏于家

玉汝玉初名璵立中仲子年十七中元江浙鄉試洪武初有司辟攝郡庠授應天府學訓導陞翰林院五經博士預修高皇帝實錄永樂大典除左春坊左

贊善兼翰林編脩卒于京年六十七汝王文章名家
詩尤俊逸楷畫臻妙其先居蜀故自號青城山人有
集行世卒后十年 仁宗追贈太子賓客謚文靖

王璉字汝嘉與兄璉少齊名于時嘗謫戍五開以明
經舉為武昌府學訓導召預永樂大典為副總裁洪
熙初直弘文閣東里楊士奇銘其墓謂王氏兄弟先
後入翰林士君子論行已有道當於汝嘉無間言

陳繼字嗣初吳縣人父汝言洪武初仕濟南府經歷
繼生濟南十月而孤母吳夫人守節教育遣以名師
授業克底于成蔚然一時文名吳下楊士奇見其文

薦授國子博士預脩兩朝實錄進檢討尋歸卒于家有文集刊行

金問字公素吳縣人年二十二方事讀書與陳五經為鄰感其獎勵因得肆力于學不數歲為文已追逐前輩善楷法永樂中以能書薦授司經局正字仁宗在東宮甚見寵遇

劉鉉字宗器中書孟功猶子生五月而孤鞠於母陸甫冠授徒里中以能書就徵中永樂庚子鄉試授中書舍人預脩三朝實錄陞兵部主事進翰林侍講卒于官上聞訃為之嗟悼有云安得學行純篤有如此

斯人邪遣侍郎李紹諭祭 皇太子亦遣官致祭贈
贈加厚鉉為人介特有守言動不欺與人交一以誠
恪為主有卓然古君子之行平生博通經史為文根
祇義理詩亦典則所著名假菴集卒後追贈禮部侍
郎謚文恭子瀚字約之按察副使

張和字節之崑山人正統乙未與弟穆同登進士第
廷對之文橐無寬抹讀卷者竒其才請寘首選即移
疾家居一時執經問業者日踵至于門碑版之請戶
屢恒滿嘗主考江西鄉試俄驛召入翰林預脩纂事
天順改元授浙江按察司副使提督學校其教以正

心術慎行檢為本自兩浙山溪幽僻教行無所不至
和少嘗讀書馬鞍山下二十年天資絕人數行俱下
工古文詞與葉文莊與中鄭進士時又相友善平生
好聞忠賢節義事年止五十三所著述曰篠菴集穆
字敬之仕終浙江參政官績文業亦著稱于時與和
最相友爱稱崑山二張先生云

劉昌字欽謨吳縣人少入邑庠常業之外博覽群典
不求人知雖同門連業者亦莫測其造詣正統甲子
歲當大比提學孫公首以為薦同列心疑而口訾之
及試京闈高學士穀讀其文語諸同事者曰此必山

林老學置之第一撤棘乃一白哲少年為之嘆賞會
試復第二廷對大臣忌其文抑置二甲以疾乞假南
還大肆力於學造詣益深名稱益著景泰三年授南
京工部虞衡司主事嘗預纂修宋元史疾終于家年
五十七昌聰明過人書一目輒能記及習知當代典
章前輩故實叩之與談亹亹不休然性與人寡合不
可其意則相對終日默不出一語有侵之者從容順
受而已未嘗指摘人之詩文瑕類其為文章才思華
贍言詞爾雅振筆千言若有餘裕詩律尤溫麗稱一
時作者所著作有胥臺鳳臺金臺嵩臺越臺岳臺等

集蓋紀載所歷也在河南編刻中州名賢文表又嘗類本朝文章如文選文鑑類為一書

陳鑑字緝熙長洲人父謫戍鑑依父友范叔瓚從老氏學少有高資竊好儒家言能通其說下筆為文輒有奇氣他日以事如浙市書而歸晝夜誦習卒棄其學而歸於儒以其餘力治進士業正統九年甲子鄉試第二明年會試中乙榜入國學為李忠文公弟子文名益起十三年廷試擢第一甲第二授翰林編脩充經筵講官進脩撰英宗復位奉使朝鮮天順初預脩大明一統志尋充東宮講官遷侍讀脩

宗實錄進侍講學士未幾陞國子祭酒以事落職而
死鑑父沒戍所嘗東使代祀便道亟父骨歸葬迎其
母養之于官後返于吳事之甚謹毋卒居喪時方脩
實錄有詔起鑑鑑兩上章求終制允之平居無聲色
之好嘗使朝鮮有詩却妓侍夷人敬服板刻其詩行
國中無子

劉珏字廷美長洲民家子初辟為府掾不從詣府白
于守况鍾願從儒守嘉之充縣學生中鄉試擢刑部
主事未幾乞歸田里肆意幽賞作林園之勝號小洞
庭與徐武功祝大叅輩唱酬詩酒為樂其風流可尚

也珏志趣高簡不專功名博古精鑒晉宋以來法書名畫多能購藏善為唐律詩比屬精切音旨流暢書効雲麾行草各極其妙尤愛寫山水

張泰字亨父東倉人由進士授翰林庶吉士陞檢討用薦提學河南以疾辭陞脩撰卒生而秀異為人絕去崖岸靜嘿寡言蕭然閑野之適自以官居清華况味有餘文追古人詩備諸體長沙李侍講東陽序其滄洲集而以高太史擬之為天下惜也

陸鉞字鼎儀天順癸未會試第一人廷試居第二授翰林編脩尋陞脩撰晚得末疾告歸即其家有白金

文綺之賜明年已酉卒訃聞勅葬祭禮蓋殊恩也錢
性冲淡簡默聰敏過人所為詩若文務出人意表書
亦自成家法有春雨堂集藏于家

奚昌字元啓治易正統甲子中南都鄉試老於問學
兼通書詩四方之士受經於昌者皆先起科第入官
乙丑而昌年及五十始得進士竟以病卒辛卯歲當
大比江西大藩走書幣請主校文昌辭不赴為人惇
行誼與弟友愛束脩所得悉畀之雖甚費不吝性喜
吟詠嘗以徐字為韻賦千篇以見志和者亦衆文主
理致平易鬯達可觀昌既第郡中表其坊曰老桂昌

同里有二人皆登進士曰顧珣文之有廉介曰顧玠
惟遠有孝行皆不及祿仕而卒

周庚字原已初名京字元基自少穎敏好學家世自
宋元以來業醫其父尚正知其志不欲以醫名不強
也庚初隱居養親將終其身俄太醫院奏下吳中徵
名醫中有庚名時知府丘公請脩郡志始乞入學就
弟子列冀免不得遣被逼上京未幾選入禁中典御
藥數以醫驗授御醫久之擢南京太醫院判庚為人
慎密清雅狀貌癯然喜為詩平實深秀語多絕俗卒
年四十七無子

陳頎字永之郡之長洲人由鄉舉授陽武縣儒學訓導致仕頎業文擅名吳下尤通醫為人清脩苦節其文好議論有開中今古一卷及其所著之京適楚遊梁還吳四錄并洪都紀行摠曰味芝居士集

論曰文章者寫萬物之情狀發五聲之音響大則作訓垂範匡主和民次則宜于詠歌便于時用文之為用大矣哉雖出言異句下筆殊形實異質而齊芳殊音而並美者也檢名實于千載之事定得失于一管之鋒非徒為之難知之實難矣昔人有解嘲者曰子若謂我是耶則是不必以合俗子若云俗果非耶則

俗非不可以苟從其知言哉孔子諸子獨子游為吳人至橋名文學自是江南地方數千里士子風流皆出其中宜文章之體為世人所驚也若二陸龍躍雲津信是江南之寶季鷹縱適一時不沒身後之名才雅如彪諷諫盡託于文章多識如績著述不廢于軍事或邕獨見賞或歆不能呼或次於漢通或貴于蜀地其風世篤焉咸言坐握蛇珠誰許獨為麟角季迪季載異代同芳矣所幸者高彪奏奇文之箴漢靈畫像張率擅得人之譽梁武賜詩佐日詩吟于武后公異辭歎于德宗主上右文作者生氣誠千載一時也

獨張溫沈友因事遇害三陸韋曜同被見誅以爲焚
身蘭摧玉折豈非遇不遇之故哉若曰不用身後之
譽惟用目前之知則所謂俗者果尊於君而嚴于親
耶

贊曰文以化成敷其麗則情性風標神明呂律振玉
鏘金同聲異色詞無竭源筆有餘力彪乃作箴純則
賦席川岳之寶延門之德援毫銘刀入寺辯泣泉源
同流宮商如一

吳中人物志卷之七

吳中人物志卷之八

長洲張

曾

閨秀

漢

薄姬文帝母吳人許負相薄姬當生天子漢虜魏王
豹而薄姬輸織室詔納後宮歲餘不得幸高祖坐河
南宮成臯臺召而幸之薄姬曰昨暮夜蒼龍據吾腹
高祖曰貴徵也一幸而生男是為代王其後薄姬希
見高祖高祖崩諸御幸姬戚夫人之屬吕后怒皆幽

之不得出宮而薄姬以希見故得出從子之代呂后崩大臣議立後疾呂氏強皆稱薄氏仁善故迎代王為孝文皇帝而母為太后

吳

許升妻呂氏字榮升少博徒不理操行榮嘗躬勤家業以奉養其姑數勸升脩學每有不善輒流涕進規榮父積忿疾升乃呼榮欲改嫁之榮歎曰命之所遭義無離二終不冝歸升感激自厲乃尋師遠學遂以成名尋被本州辟命行至壽春道為盜所害刺史尹耀捕盜得之榮迎喪於路聞而詣州請甘心讐人榮

乃手斷其頭以祭升靈歲餘姑亡夫族多欲聘之誓
不再嫁黃巾賊陳寶欲干穢之榮執節不聽踰垣而
走賊拔刀追之賊曰從我則生不從則死榮曰義不
以身受辱寇虜也遂殺之是日疾風暴雨雷電晦冥
賊惶懼叩頭謝罪乃殯葬之糜府君聞榮高行遣主
簿祭之又出錢助縣為冢於嘉興郭墟北名曰義婦
阪

二貞婦者公孫達妻邵李公謀妻戴各遭寇賊臨之
以刃曰寧為我妻而生乎將不從而死乎二貞曰婦
人以貞淑為節豈可畏而妄行邪賊遂殺之

沈伯陽妻顧文宣之女字昭君早寡無嗣孝養其姑父潜已改嫁其姑聞而哭之昭君驚惶上問姑姑以實告昭君泣曰妾聞婦女以專一為貞回二之行非所聞也乃割耳剪髮以明已志

孫奇妻廣陵范慎女名姬年一十八配奇一年而奇亡父母以其少寡無子迎還其家姬不肯往迎者迫之姬乃割耳及鼻曰父母迎我者不過以我年少姿美今已殘矣行將焉如於是迎者空反

張溫姊妹三人皆有節行兄溫為孫權所囚姊妹已嫁者皆見錄奪其中妹先適同郡顧承官以改嫁丁

氏成婚有日遂飲藥而死吳朝嘉歎鄉里圖畫為之
贊頌

三國

吳主孫權母吳夫人家本吳中徙錢唐早失父母孫
堅聞其才貌而娶之初夫人孕而夢月入于懷而生
策及權在孕又夢日入其懷以告堅曰昔姪策夢月
今也又夢日何也堅曰日月者陰陽之精極貴之象
吾子孫其興乎策功曹魏騰以迂意見譴將殺之夫
人向大井謂策曰汝新造江南方當優禮賢士捨過
錄功魏功曹在公盡規汝今日殺之則明日人皆叛

汝吾不忍見禍之及當先投此井中耳策大驚遽釋其罪及權以少年統大業夫人助治軍國甚有裨益建安七年臨薨引見張昭等屬以後事黃龍元年追尊為武烈皇后合葬高陵

陸景母張承女諸葛恪外甥也景母坐見黜景少為祖母所育養祖母亡景為心喪三年

晉

會稽張茂妻陸氏茂為吳國內史晉永昌九年茂與三子俱為沈充所害陸傾家產率義部曲討充敗詣闕上書為茂謝不克之責詔曰茂夫妻忠誠舉門義

烈宜追贈茂官太僕

穆帝后何準女居崑山南村一夕生后群鳥驚鳴明日赦下又鳴今名其地曰烏夜村

顧琛母孔氏時年一百餘歲安帝隆安初琅瑯王廞於吳中為亂以為貞烈將軍悉以女人為官屬孔氏為司馬及孫恩亂東土飢荒人相食孔氏散家糧以賑邑里得活者甚衆生子皆以孔為名

齊

韓蘭英郡人女有文詞宋孝武時獻中興賦被賞入宮明帝用為宮中職僚齊武帝以為博士教六宮書

學以其年老多識呼為韓公時有顏氏女夫嗜酒父母奪之不出宮為列職帝以春夜命蘭英賦詩曰絲竹猶在御愁人獨向隅棄置將已矣誰憐微薄軀按隋志梁有宋後宮司儀韓蘭英集四卷

宋

范法恂郡人妻褚氏勤苦執婦業昇明中孫曇瓘謀反亡命褚謂子僧簡曰孫越州先姑之子與汝父親則從母兄弟交則義重古人逃竄脫不免汝宜收之曇瓘尋伏法褚氏令僧簡往歛葬之永明中褚年七十餘卒先僧簡在都聞病馳歸未至而殯尸不起俄

僧簡至焉

張冲母戴顓之女也有儀範張氏內取則焉

張稷長女名楚媛適會稽孔氏無子婦宗州人徐道角作亂害稷女以身蔽刃同遇害

唐

張鎰母鎰為殿中侍御史時有華原令盧樅得罪案驗樅當免官有司承風以死論鎰白母曰默則負官否則為太夫人憂母曰兒無累於道吾所安也遂正其罪樅得流鎰坐貶鎰自有傳

吳江女道士李白有詩云吳江女道士頭戴蓮花巾

五代

吳仁璧女少能為詩父教以玄象陰陽之學仁璧自登第後生業甚薄嘗居越中佯狂求食一日女謂父曰大人慎事出入恐懼憂毒唐天復初錢鏐命撰毋水丘氏墓銘仁璧不從被繫女泣曰文星失位大人其不免乎鏐命除水部員外郎遂沉之東小江怒濤中併女同害時年十八

宋

建康劉士英妻郡人陳氏女被虜獲赴井死士英靖康初通判太原城陷被執罵賊而死立廟曰忠烈

張弼妻徐觀妙直祕閣閔中之女也建炎三年金兵犯揚州官軍望風奔潰多肆虜掠操執徐欲污之徐瞋目大罵曰朝廷蓄汝輩以備緩急今敵犯行在既不能赴難反乘時為盜我恨一女子不能引劍斷汝頭以快衆忿寧肯受汝辱以苟活邪賊慙恚竟刺殺之投江中而去弼歷陽人

吳永年妻何氏建炎四年金兵陷平江官軍遁去城中人死者五十餘萬永年與其姊妹及何氏奉母逃匿母老須扶掖而行為賊所得將繫其姊及何氏何給之曰諸君何不武邪我婦人輩東西惟所命耳賊

信之行次水濱何謂其夫曰我不負君自投于水其姊繼之陳長方作二烈婦傳

長安縣君丁氏為晉公之妹嫁殿中丞陳質生二子曰之奇曰郢晉公欲官之丁氏固辭曰俾自以學術進晉公竦然稱歎之後之奇兄弟相繼登科鄉里稱為賢母安定胡先生著為丁氏賢惠錄蘇子美為書之里人張紳世與陳舊其婦婉而歿丁氏保其嬰歸付乳媪親為撫視能言而還之晉公南謫家日淪謝有孫女幼孤丁氏訓養厚於已生至於有歸時郎中黃宗旦守郡稱丁氏之賢可書于史

王埜母埜官浙漕時嘗被論埜以母夫人年老改除
母曰我已知之昔汝父以忤時相去國今汝又如此
我方以為喜汝復何憂時人稱為賢母

武狀元周虎母何氏虎為和州防禦使寇犯和州母
城守有功進永國太夫人母死誓不仕後母子俱祀
和州

吏部郎中鄭絳妻錢氏廣陵王之玄孫事母甚孝謹
無故未嘗去姑左右姑寢疾嘗藥餌不解衣者半年
宗族皆稱之絳素貧赴官陝右不能具行裝錢氏姊
自京師持金幣厚遺之錢氏不啓封而歸之退而曰

身受其賜何以全吾夫之廩其賢又如此錢氏卒于靖康元年

郡人尚書朱億女工琴書至道初裴愈奉使兩浙聞其才藝奏之召至京師既入宮掖賜號白蓮花夫人後出俗刺血書蓮花經一部改賜慈濟廣惠大師尚書子光祿卿公綽之女二十娘子嫁朝請郎李防亦聰慧作混元圖贈宜人

狀元黃由夫人平江胡元功尚書之女善筆札時作詩文亦可觀至於琴瑟寫竹等藝皆精自號惠齋居士

李處道妻龔都官宗元之女有文學賦詩作楷皆工
喜誦佛典處道年高而宦不達龔氏能安之

侍郎徐稚山妹嫁為處州祝磯之妻敏慧能詩孫覲
以為不類婦人女子之作其筆墨畦徑多出杜子美
而清平冲淡蕭然出塵自成一家而賦尤工近世陳
去非呂居仁未能過也有閨秀集二卷傳於世稚山
嘗與夫人坐有言太素脉類妖妄者夫人徐曰醫和
視晉侯之疾而曰良臣將死天命不祐非太素脉乎
其學識明辨一如此

沈清友姑蘇女子也能詩有云晚天移棹泊垂虹閑

倚蓬窓間釣翁為底鱸魚低價賣年來朝市怕秋風
甚得風人之體又詠漁父云起家紅蓼岸傳世綠蓑
衣詠牧童云自便牛背穩却笑馬蹄忙得下字之工
吳中李氏女能詩有詠破錢云半輪殘月掩塵埃依
稀猶有開元字想得清光未破時買盡人間不平事
唐廣真嚴州人既嫁得疾夢有道人與藥服而愈迺
往平江謁叢衣先生留于吳號無思道人淳熙年赴
郭氏飲驀昏兀如醉兩夕方蘇言若有呼我者出門
逢呂純陽曹混成歎道僧三人引至海邊跨大蝦渡
海因隨遊名山洞府純陽問曰汝欲超凡入聖耶身

外有身耶留形住世耶棄骨成仙耶對曰有母尚存
願盡孝道曰汝是則且留形住世遂持丹一粒分而
為四投之盤中圓轉甚疾其一吞之自是不食惟飲
酒啖果而已能夏暴烈日中冬卧霜月下高宗聞其
名召入德壽宮行符水有驗御書寂靜先生四字賜
之

元

周烈婦姓張氏崑山太倉人年十七始贅夫至正十
六年立鎮海萬戶于東倉以烈婦之父為百夫長歲
餘與其伍將謀刺其軍帥事泄夷其家烈婦之父母

及夫皆死次縛烈婦于武陵橋將斬其軍帥之子惜其姿容舍之誘之曰能從我活命烈婦怒曰豈有父母死而我獨生乎又曰苟從我當葬汝父母與夫烈婦益怒曰我惟知死耳他無望也拔所佩刀磨其面曰汝不從斷汝首啖汝肉烈婦厲聲罵曰不義賊乃憤而殺之會稽楊維禎為之立碑其文曰人之所惡莫甚於死從容就義烈士難之况婦人乎

擔夫婦不知其氏家郡城在公庾為擔夫張氏時應募出充戰士丁未六月戰死于城西門其婦聞之號泣城下得其屍解衣為斂哭盡哀既焚之收其骨裹

以帛仰天大籲身與骨俱投於水

廣平路總管浦源子玉田妻梅氏吳人至正十六年
淮兵南下守臣弗夙戒城遂沒梅氏匿旁小民家外
兵入夫逸去梅氏為兵所得見其有容色將污之梅
氏探懷中金與之乘間赴水水淺不得溺兵至水次
刃擬梅氏梅氏不為動兵舍去後至者見婦面水上
知其生復欲鉤出之力挽不肯升兵怒以戈搯其腋
死高太史啓為傳

李富妻黃氏崇明人至正初海寇入境掠婦女登舟
者二十餘人黃氏義不受辱即投海死時年二十有

七

后載妻失其氏載為郡吏至正丙申春正月載行役如京口妻年三十姿色殊麗生一子一女二月城陷其妻先屬其子女於他戚謂所親曰曩吾夫平居時每論婦人失節妾常耻之今吾夫在遠而罹此大變使幸而免尚不能不為夫子憂不幸為所辱雖欲死不可得矣妾寧捐吾軀以全吾心他日尚有以見吾夫於地下語未絕外兵攻入而載妻赴水矣

楊椿妻王氏椿死節王氏與子女二人皆不食一日

卒詳見椿傳

沈慶一妻謝氏年二十八孀居至正壬辰海寇方谷珍驅民駕艘入劉家港謝氏以姿容將見掠乃積薪縱火自焚而死

七姬皆良家子為江浙行省左丞潘元紹側室當至正丁未七月五日元紹臨戰婦召七姬謂曰我受國重寄脫有不宿誠若等可自引決毋為人恥一姬跪而前曰主君遇妾厚妾終無二心請及君時死毋令君疑也遂入室自經六人亦皆相繼經死元紹歛其屍焚之以骸葬後圃合為一冢潯陽張羽為作七姬權厝志乃列其姓氏云程氏蜀郡人年三十翟氏廣

陵人年二十三徐氏黃岡人年二十羅氏濮州人年
二十二卞氏海陵人年與羅氏同彭氏與卞氏同段
氏大寧人年十八其先死者也

丘氏名端一礪之後家東始贅花林齊一億億早亡
丘守節靡他元季淮兵寇吳下突入丘氏其父遇害
端一不得脫盜見其姿美欲污之端一大罵不辱遂
被殺

陳寶生母莊氏海鹽人其父諱思恭泉州大商贅于
莊一年生寶生甫四月思恭去商海上久而無聞人
以為死莊自誓不嫁後思恭還及五年又浮海去遇

溺死莊益守志思恭有前娶生子曰寶一在外家莊
曰且彼所生與吾所乳均出吾子乃質田與之養思
恭又嘗假貸于友人家五千緡友人至是負官錢繫
獄莊曰不可死有所負也傾橐償之寶生與寶一為
兄弟如同胞後寶一死寶生為育其孤女是知莊氏
善教之有素也寶生長好文與縉紳大夫游乞言表
揚母節嘗築春草堂奉母于太倉里第

唐士則妻曹氏甫笄婦士則而士則客死鄱陽曹氏
年二十守節四十四年而終見秦約所為傳

潘紹宗妻金增崑山石浦人紹宗卒金氏尚少艾有

貞操里人欲謀其實以聞表厥里居金氏聞而止之
曰朝廷著令廿九得聞三十不得聞也里人曰降一
在我無難誰能知者金氏曰此非吾所安也遂寢其
事鄭進士文康書之

盧本立妻王氏諱妙寧吳縣南村人年二十八喪本
立遺孤方七周誓弗再嫁所親利其產屢欲奪其志
王氏益堅所守撫育孤呱至于成立孀居五十一年
壽終

王廷用妻滕氏年二十三而嫁嫁七年而廷用沒孀
居有守嫁兩女不登其門娶兩婦不預酒宴聞父喪

但西向痛哭幾絕而不往臨曰未亡人無奔喪禮也
遺二孤滕氏身教之曰無姑息無父兒也其孤曰琦
果成立持門戶嘗以母節欲上聞滕氏力止之曰吾
節分內事耳後八十七壽終琦長洲荻扁人

臨安令盧廷瑞繼室周氏從夫為江浙行省屬官有
姬為人鬻珠偶失之無以償將殺身以自明哭泣過
市周氏聞而憐之謂臨安君曰姬失物願脫簪珥以
償之君曰善周氏乃代輸之姬因得生事聞于省宰
相而下稱譽曰賢母一時士大夫皆為文詞以傳之
張達第五女生三歲喪母靈牀上屏風平生舊物屏

漏沾濕出曝晒之女子一見伏牀流涕家人怪其不起乃往抱持薦席淹漬精神傷沮不能飲食將以問醫醫診脉云腸斷矣因吐血而亡中外莫不悲歎
沈仲說妻鄧氏無子鄧氏私為納妾于室仲說以故人女嫁之事詳仲說傳

趙淑儀吳縣一都趙夢炎女夢炎卧病時年七十餘家貧無醫藥之資淑儀方年十八乃焚香禱天割股以愈父疾里社以孝行聞于有司時真定董章為郡守給綵障製孝女歌饋以豚酒錢幣大書孝行于門
楊椿妻王氏椿禦賊而死王氏被髮徒跣冒鋒鏑尋

尸三日不得幾為群兵所刃者數焉又擗踊抱婁閔之柱大呼動地而訴其帥曰妾不幸至此人孰無夫婦汝等專務殺人而來耶欲為安民之計耶帥疑之禁其兵勿阻其往來乃於張香橋下得其屍與婦葬之其夫之神憑附於身曰我已死汝無他志期五日當取汝與吾子女同歸及期王氏與子女果一日亡鄭允端郡人施伯仁妻能詩有肅雍集一編自為之序引

蔡貞婦韓隱士公望之妻宋忠惠公襄十二世孫讀書通大義善筆札嘗書經刻梓行世

國朝

張員外槩妻金氏名泚寧年二十二嫁槩槩得罪吏具辭將寘于法泚寧聞之曰吾雖婦張未及朞月義不可使夫獨死謂死于夫死之後孰若死于夫未死之前使其無疑憾於地下遂經死後三日槩得宥葬婦于先塋事在洪武十九年天台林右作張烈婦傳胡原崑山太倉人妻錢氏洪武三十年原戍雲南逋竄事覺坐法棄市錢氏與夫訣曰汝萬里歸為母與妾耳今汝死妾何獨生至夜分抱乳兒而泣曰吾不能保汝矣遂入寢室自縊時年二十八袁華為傳

顧烈女父母早亡鞠於叔父初許嫁王氏未及醮而夫亡誓不再適叔父復許他嫁不得已乃通體纏束牢不可解至其家曰我非爾婦乃故王郎妻也遂經死烈女崑山太倉人

沈濬妻吳氏濬崑山縣吏濬病危時鄭宜君方死節聞吳因感動之后一月濬卒謂其十歲孤曰吾不能撫汝矣歛喪畢從容洗沐更衣自經于室後濬才五日也時年二十九

薛烈婦崑山半山橋人父為銀工嫁縣小吏邵某洪武初邵坐死法京師提取烈婦年二十餘有姿色差

人悅之謂小吏曰若欲坐置都下盍使事我否則盡
在途中小吏密呼烈婦從其言烈婦曰我身污潔君
不可知君不復得生矣佯曰諾是日盛饌飼小吏暮
歸遂經粉閣中鄰里解其屍葬之于西湓瀆村胡氏
菜圃

史景忠妻鄒氏年十八嫁景忠而謫戍大寧鄒氏與
其姑及一女在行丙子歲邊寇發大寧城中兵卒有
犯之者鄒氏不從卒脇以刀鄒氏嚼齒罵曰義死不
辱延頸受刃竟殺之時年二十有一崑山張先生和
為作傳

于得泉女許贅徐景仁未婚而景仁劓景仁之父以
其子殘廢欲已其婚得泉甚悅其女不從曰彼初非
殘者竟成婚事夫甚謹後數年景仁以前事例戍雲
南其弟于祿謂曰若他適可免否則死萬里矣于氏
曰此何難遂自經死

陸氏子以吹笛為生其妻田家女也陸病久其女歸
父家求升粟而還其夫已死女哀哭祭享之遂自經
于夫屍之傍

王妙鳳洞庭東山民家女許嫁吳奎奎母有汚行妙
鳳知語母求絕婚母諭不可既嫁奎奉姑尤孝敬夫

出賈南楚汚人來姑計使浼鳳見鳳輒不能發一日
汚飲姑室命鳳溫酒鳳恚甚行挈鉞出思重姑令乃
復入厨姑趣汚尾之汚紛鳳臂鳳隨取刀斫此臂不
殊又斫始斷婦家母將訟之鳳曰死則死耳世豈有
婦訟姑理耶逾旬卒

狄阿先嘉定人妻高氏配狄一月狄患癰死高抱屍
慟哭三日家貧火葬火熾高氏躍入火中姑救出之
高恨不得從夫地下死乃歸舍斷髮自誓其夕竟就
雉經于室

陸淑清陽城人頗聰慧識字許村夫楊紹淑清年二

十二兩家皆貧不能嫁娶紹執役徃京師惡人黷淑
清容色謀妻之集黨撼其翁父不從我得悔後禍
邪翁父然諾淑清聞之號哭達曙惡人強委禽焉送
酒飲食淑清父母父母出飲食淑清即自縊

常熟烈婦不知姓氏弘治辛亥大水饑饉相仍夫鬻
其婦與一貨饅男子得錢三十七文其夫得一飽而
去婦與男子行未數十步過一小橋大聲呼其夫遂
投入水不能救烈哉婦也錢貢士仁夫聞于林應良
為作傳以表稱之

潘純粹中永樂初為御史居北京娶穆氏女為妻穆

氏祖父皆世勲不知其有室也其妻黃氏不知娶於
穆自蘇至京純懼而館于他室越五日穆氏知之執
妹禮以見黃氏曰吾初不知有汝也吾有子婦田宅
在鄉吾當還汝善事君子乃以珠翟霞帔遺之明日
穆氏父兄至將論純而婦女穆氏以理論之黃氏又
以女事其父兄感動和好後純出宰信陽二氏同處
十六年始終無間言可謂賢婦也已

長洲卓氏女字永潔適里人徐宣洪武壬午宣卒卓
氏年二十一遺男女二人越二年二孤盡死卓氏操
守益堅既而舅姑皆歿其母嘗疾蕉巫醫不能効卓

氏割股作糜以進母食而愈後母壽終執喪盡禮人稱節孝之婦

陳良紹女年二十聰敏知書史良紹卒親族欲以乘喪嫁之女曰死者何人而欲吾膏沐衣綺乎衆慙而退其居父喪尤盡哀戚事在正統四年

吳天祥妻趙氏家貧奉姑甚孝天祥傭身於人趙奉養之際每於三炊貯米一握積之以易醬肉為姑致滋味使姑悅而不知家之貧也有兩兒姑酷愛之每食必呼趙於食頃驅之出即闔戶姑問何在紹云自留與不足念慮或云方出嬉人常見兩兒風雨蹲簷

間問胡不歸兒云非他故為母奉婆婆羹恐婆婆分
食我因暫遣外食畢即返舍耳天祥長洲相城人沈
徵士澄為作孝婦行澄有女嫁同邑王氏生女諱素
勤婦義士

錢珍妻顧氏諱淑清元季張氏之亂游兵剽掠舉家
逃難時珍先妻邵遺一子名友安顧生子名虎俱在
襁欲負與俱力不能勝乃謂夫曰胤子不可失當弃
吾兒乃弃虎于強家灣抱友安入江陰城七日兵退
而歸鄉里咸稱其賢方之魯義姑云

錢孟書妻傅氏孟書為蘇學訓導年四十無子傅氏

為買妾冀育以為嗣妾久無所出又為謀待之其與處有恩餘二十年孟書終無子

李氏女生吳中洪武初人能詩有集一卷其警句有曰桃花一簇開無主終不畱題崔護家

孫寒華吳人孫奚之女師杜契受玄白之要容顏曰少周旋吳越諸山十年乃得仙道而去一云吳大帝孫女於芳山得道冲虛而去因名其山曰華姥山

余華妻徐妙迕崑山人徙嘉定年十六贅華為壻華客齊魯間病卒妙迕守節不嫁袁華為傳時洪武十六年也

顧德華吳人洪武中取富民實京師生女名婉寧贅壻不二年婿卒父母欲奪女志女曰豈有事夫而再乎淚雨下父母不復言居家極盡孝道年五十二居為鄰火所燼結小屋居之父尋卒其他欲迎養焉女曰生於斯豈有他適哉有死而已越十日卒時正統十一年也

楊氏九娘嘉定人性至孝幼以父命夜守田車苦為蚊嚙不易其處竟以羸死里人傷而祀之後其地方廣數里絕無蚊害他所當暑夕輒書九娘於壁以禦蚊其神異如此

論曰晝選男德宵靜女德不可以一途限也婦德在
於溫柔立節資于貞烈成仁顯義匪此莫由而富都
那豎不與焉然溫柔以成仁必挺獨秀者則書貞烈
以顯義凡樹風檢者悉錄良以彰勁心于後凋表貞
期于上德尤非易易耳貞嫠之婦欲守一醮之禮成
同穴之義遭值不仁世叔無義兄弟多至迫脅往往
自縊房中飲藥車上蓋所以長貞潔而寧父兄也吳
中徽烈呂榮致疾風暴雨之應顧昭示割耳翦髮之
貞張女飲藥于見錄孫妻毀形于迎者閨中之女蹈
死不回擔夫之婦捐生匪吝七姬抗情而並天二婦

守操以令終皆冥踐義途非因教至流聲竹素圖像丹青豈將草木以俱落與麋鹿而同死哉若夫賢妃助國君之政哲婦隆家人之道仙姑弘玄白之風與貞女亮明白之節不專一操微美未殊也故自漢晉而後摻次才行尤高秀者綜其成事述為閨秀篇至詩人顯武丘之花草刺史表韋白之風流真娘張態徃徃見稱跡雖標勝類不兼書蓋以彰女德重風檢而已

贊曰陰禮柔則彤管青黎子政元凱盛有前規吳多孫母漢紀薄妃茂如詣關升卒尋師貽不啓封失則

代翰四德三人六行七姬韓公多識徐妹工醫寒華
得道清友能詩傳恒致妾趙必驅兒官成司馬號取
無思激揚千載齊風一時

吳中人物志卷之八